

四庫全書

集部

欽定四庫全書

石倉歷代詩選卷四百六十

明 曹學佺 編

明詩次集九十四

魯鐸

入院言志

聖明重輔理推心任儒臣玉堂敞北扉儲養歸陶鈞商
家禮三俊周室須常人肆令黃閣老藹藹伊周倫而我

樗散質亦與名材掄賴茲措範在啓發傾倉困豈徒事
文字衣鉢傳經綸我生頗辛苦所懷非憂貧願言策駕
蹇周道隨清塵

讀李詩

天地獨長久謂亦終銷鎔朝菌同一盡何必論喬松誰
云李太白曠達擅高踪有酒不自飲乃勸羲和龍麻姑
既霜鬢誰能駐顏容

送友人歸武功

庭臯鳴落木游人感秋風
援琴起中夜鮮復襟期同
寒蛩響簷側高鴈翔雲中
鷄鳴戒行李微日東窗紅
游從集盤榼酒盡情未終
行人難久留矯首成西東
願言尺素書歲歲常相通

題薛間竹

繫誰融心神寫此萬竿竹
我遂南薰來炎歊正三伏
開軒一披襟灑然在淇澳
中宵起攬衣乘月看未足
高歌武公詩清風動林麓

連雨中因讀少陵大雨詩次韻一首

崇朝雨不斷
螻蝻仍嗷嗷
屋瓦欲自潰
誰其事甄陶
莓苔近几榻
紺碧綠中袍
睽彼瓜豈畦
渥然起叢蒿
桑樗未及肩
頃復過簷高
乳鴉苦沾濕
垂翅仰母號
庭前有馴鶴
戛然思林臯
西疇渺畔岸
嘉禾戰風濤
東隣失墻壁
入夜輒引勞
籬落濫盆盎
飄忽輕一毛
溝塍慢慢閉
吾方笑兒曹
十日行不雨
桔槔應爾操

三農苦

癸未四月雨併遺東作忙盛夏雨不嗣連月恣恒暘鄰
湖鰾數級安問陂與塘高秋報淫雨宵晝聲浪浪山村
早焦槁自無卒歲望原田所灌溉糜爛無登場澤農陷
巨浸什一惟死亡貧者為耕治鵲兒營種糧迺今益窮
迫骨肉矧異方富者憂盜賊撲刼羣虎狼向聞司租使
適經川澤鄉芄芃賞禾黍詎信愬灾荒三農苦復苦天
高難自明未論死溝壑官租何由償仰首向天泣旻天
但蒼蒼

雜感

晉室失其馭所資惟賢豪謝公負雅量人士歸臯牢聲
樂自滿耳舉世方驚濤安能縮首尾共作寒蟲號清顏
照木石東山為增高肥水了大事餘筭曾無勞高松豈
具眼嘲戲同兒曹

其二

東村有松檜西村滿楊柳我家住村東來往村西久浮
陽起郊原游衍及親友取蔭東西村常倒尊中酒風霜

倏摧厲此意遂相負吾廬翳松檜搖落殊未有

其三

端居有所思所思在長安冉冉歲云暮夢想接容顏
緘書不我遺悵此別恨端徙倚向幽獨喟然傷心肝

其四

孟冬天氣肅朝霜被蕪萊寒泉細無聲鷓鴣鳴何哀遲
遲歲華晚芳意忽已摧撫景生感傷幽思何能裁

其五

金匱要略卷之六
城居苦塵事去作邛上遊驅車未及半且復泛輕舟
峩五華山杳杳三筵流山水清且閒俛仰見沈浮
魄無經世才空有杞人憂潦倒終宇宙道廢何能
酬

其六

懷人不能寐被衣彈鳴琴鳴琴若作意中夜發孤音
美人在何許遙憶湘水陰征鴻去不返雙魚逝何
深引領重躑躅幽恨獨難任

伏生傳經圖

祖龍火中書作堆阿房相繼為塵灰九旬老儒食漢粟
元自咸陽坑外回向來傳道心自許挾書律在無儔侶
太常掌故來何遲舌固猶存難正語閨中弱息諳聖謨
口相授受曾何拘刪書門下誰復在一女擬當三千徒
掌故心神只方策耳目何嘗滯聲色楚國雖亡見倚相
孔堂未上聞金石謾道方言多異同濟南不與潁川通
子襄科斗人不識考論文義終誰功天為斯文存一綫
漢人及見先生面吾今尚恨禮殘樂不傳當時試問寧

徒然

李在山水行

高秋爽氣生林末，山色朝來如黛潑。
西風洗天無閒雲，萬里天心正開豁。
羣峰盡處見平原，漠漠寬閑水上村。
村西返照界斜影，千尋石壁當溪翻。
隔溪誰子愛林麓，直旁陰崖結茅屋。
墻支亂石就迴岩，門向清流只橫木。
水禽獲水飛仍低，小舟度晚蒼波迷。
行人趨渡半不及，夜來應借山家棲。
何物李在善模寫，欲與造化混真假。

安得此境置吾人一時突兀千萬厦沃壤連溪山復深
安居粒食生林林眼前寒士皆大庇杜陵千載同吾心

添綫詞

寒日趁天無約摸短長那遣忙人覺漢宮相語驚翠娥
繡綫朝來添幾何昭陽宮門在何處歲晚無由通線路
憑誰却問承恩人遠近何如天度數

為劉鶴厓題吳偉畫

吳生筆有神無慚呼小仙一泉片石世奔走此圖揮灑

仍何年縮來嶰谷三湘地
柴桑栗里依稀是箇中物色
寧徒似伶倫老枝痒王孫胡不歸
泉明醉眼欲盈把渾疑風露侵人衣
虛堂坐對意更遠九方輪扁俱天機

金瓶牡丹

沉香亭外饒春風名花種種無雷同
清平有樂媚妃子君王帶笑迴重瞳
是誰忍愛各剪摘蠟封挿向金瓶中
天香國色乃如許打剥定藉花神功
寧知中人十家賦纔供深色花一叢
長安愛花已成俗不隨兒女唯韓公

我從千載嗟往事愛花竊比漁溪翁

燕泉為子元何少宰作次厓翁韻

出堂古書帶新注時時傳向人間去山中有水名燕泉
護繞山人注書處堂前洗硯動迴塘墨潘涓涓欲濫觴
積流到海變海色河伯天吳驚大方山人為霖躡臺省
手挹天瓢入虛洞稿枯萎薊足沾濡困暘沈痾快涼冷
忽憶泉頭書滿家蓮開魚泳近橫槎眼前用世功已就
鏡裏流年鬢未華試問登崇何歲月童年文擊南宮節

今古勲庸校蚤遲燕泉大與礪溪別

輓楊處士詩

幽人舊隱洞庭北山靈獨許心相得幽人今葬山之陽
汀蘭岸芷無顏色佳兒挾策游神州南歸却抱終天憂
從今愁見舊風物不上岳陽城上樓

說劍次韻劉用章

人間劍客何有邪試聽說劍多浮華由來神物本天造
剌鍾切玉寧須嗟鵜膏腥穢無所用陰風撲眼飛寒花

千年老蛟潛海底劍芒射水蛟應死君家古劍真龍泉
苔斑土繡須料理床頭白日動地雷萬金寶匣防批推
會當提去信君手蛟螭授首非君誰

漁景

桃柳穠纖含曉濕篷背晴曦晒簑笠汀洲草芳鳬雁飛
江風撲岸炊煙急中湖布網却伊誰作力包羅意恐遲
春深欲勸同休息正是魚龍孕子時

其二

湖天映雪如銀甕湖水朝來欲成凍潭底寒魚貴似金
高人夙約遙相送推窗慰勞水在鬚仍促僮奴辦早厨
隔汀為問幾家住曉爨都生烟火無

陳竹坡壽詩分題得竹逕琅玕合

子雨贊
善父

竹坡先生賸幽暇種竹成林繞精舍舍傍引水作方池
竹底泠泠細泉瀉先生看竹樂有餘不羨豪奢起臺榭
開逕因栽嶰谷筩賞心累駐山陰駕綠玉陰森難比倫
祇須箇箇連城價衝牙編磬聲戛摩瓊琳琬琰光交射

春風長兒移上林琪花瓊樹枝相亞貞懷度世肅霜辰
清思滿襟明月夜節間詩刻共輝映窗裏圖書得因藉
三湘渾欲接風烟六逸還應忘秋夏閤者寧容俗客通
園丁未許凡禽下酒力微消衣色寒茶烟初斷棋聲罷
千年難老棲鳳枝蒲柳楓楸幾凋謝先生合是竹中仙
住世逍遙人不訝誰當從之乞拄杖試向葛陂看龍化

劉尚寶充柔邀同其父友桂翁遊牛首獻花岩

次白樓韻

牛首花岩景如許有美符卿遙作主星言速客更興親
天為清塵夜來雨溪毛野蔌紛采掇脆碧柔青積箱筥
若翁與客興俱豪攀壁緣崖色無沮伐木鳴鶯歷杳深
問梓尋橋看仰俯林幽花鳥不辨名壑轉烟霞各為所
題名塔頂恣危升窺燈佛洞聊凝佇奇觀書葉詩屢成
小憇班荆杯輒舉離離天際見帆來忽忽空中聽人語
要知會合不尋常試指鄉山列寰宇坐來鄉月在尊罍
更吸清暉照肝腑

橘柚

橘柚同年種新梢競過牆未輸武陵絹初試洞庭霜
岩蜜堪齋味金丸合避黃朝來持斗酒資爾聽鶯簧

夜涼

止林足山水五月能夜涼江長船侵樹雲疎月到床
坐深心隕火吟劇鬢增霜近有熟堪策新松翠作行

送李明府擢興國

晚結使君知方憐進級遲誰云遷轉日却是別離時
五

馬驕難繫雙魚遠未期漢庭歸又近何以慰吾私

丁丑至日寫懷

海內今多事囊中又一陽病常如影在日未及愁長法
駕臨烽塞人煙斷水鄉登臺望雲物風雪正茫茫

次韻虞司訓

秋日江風好帆開桂棹閒暫因看遠岫不覺過重灣浦
樹濃魚澹沙禽去復還清懷收景物塵俗詎應關

過小孤

算驛常年定征帆
隔月開寧知大寒後纔過小孤來
五兩占風變三陽擁歲回
江山倘延我更爲一持杯

送康華伯歸武功

抱屈君何似鯢魚尚北溟
壯心霜劍白舊業曉燈青
歸夢緣先壠離歌忽短亭
清才當用世誰復徇山靈

六十庚辰除夕用五十韻

流年經六十病與世相違
朋舊容疎懶林丘隔是非
形常忘彼我佩豈賴弦韋
醉向屠蘇席春盤野菜肥

次鍾歸州韻時鍾歸自外簾

有美歸州牧乘秋訪釣灘
函開青桂籍舟艤白蘋灣
且復臨歧醉休歌行路難
衰遲幸相慰時遣素書還

次韻送子文

承明丹詔下仗斧却南行
霜露嚴秋令星河驗曉晴
渙池寒水淨粵嶺野花明
况逐潘輿去鄉人與有榮

出郭次爾錫韻宗易同和

城外韶光好相將二月過
煖宜鴉乳早春被柳爭多
籠

燭防村暝簪花感鬢皤詩須陶謝賦吾為楚聲歌

湯陰次韻

野人爭席後倦客憶家時白鳥湘雲外青蘋漢水湄飲
餘中聖酒歌盡遠遊辭懶性無他羨泥中曳尾龜

閒居

別墅仍書屋閒居興頗奇野山爭入座田水暗通池鳥
語花深處魚遊月上時坐闌還散步聊復有新詩

田水南憲副寄題書院詩二首次韻謝之

俗先民隱論詩到國風向來多獻納臺省竟需公

其二

夢野臺東地山人池上園饌分魚食慣衣礙果枝繁鶯
樹新簧發鷗沙古篆存水南題品在野趣溢清言

義臺為堦郭廷貴作次舊韻

林巷仍逃俗結茅池上臺果花從牖入巢鳥隔江回徑
僻苔全合風徐萍半開偶噉雙舞鶴曉踐菊塋顏

送孫懋仁守信陽

申州每憶經行處，出守憐君近故鄉。
九曲春流繞阡陌，三關風氣護城隍。
耕桑只似巡南楚，甘旨何妨到北堂。
亦有峴山堪勒石，路人休漫說襄陽。

悶城登妙山次范以載韻

千尋峰頂立斜陽，指點方隅認故鄉。
山勢北來蟠地遠，雁行南去繞天長。
寒溪周折泉逾碧，霜樹蕭森葉盡黃。
俯仰乾坤無限意，百年勲業愧堂堂。

岳陽望君山次韻

歸槎泊近岳陽城，城上登樓逸興生。
春渚霧連芳草合，風船影沒亂帆輕。
百年不盡憂時意，千載空懸弔古情。
獨喜軒轅丹井在，夜深猶有蟄龍聲。

蘭谷為吉水廖祖倣作

青郊車馬競尋芳，誰道幽蘭可谷量。
山暖英靈常欲醉，風迴草木盡成香。
郭生翡翠何勝詠，謝氏階庭未足方。
見說楚人滋九畹，扁舟還擬泛沅湘。

與方沙河謁張文愍墓前韻

文愍墳頭野草荒
穹碑十數倚殘陽
拜臺樵牧時相戲
祭案牲醪久未香
卧寒烟無語鶴
路橫頑石是眠羊
憑君擺落興衰意
醉就邯鄲道士床

張魁山判官攝縣

君侯判沔共稱賢
臺檄還兼縣宰權
地接郡郊連雨澤
天從郎位借星躔
路入盡道遷階近
野老爭誇得惠專
守令之間見龔卓
新收故事更堪傳

孫懋仁沱西別業

屋邊沱水日淙淙
風物元應擅楚邦
蘭芷生連垂釣石
鳬鷺栖近讀書窗
城東曉色聞孤角
畦外春流帶九江
為約扁舟他日會
狂歌來和郢人腔

送胡廷和得告歸歛

北扉中秘日委蛇
誰遣同袍又別離
司馬病容青鏡改
狄公心事白雲知
秦淮野水秋通閘
建業檣風夜引旗
我有思親無限意
隨君先到漢江湄

倫伯疇修撰使安南

萬里安南薄大瀛王臣遣諭出槐廳香生曉殿衣初賜
光照晴郊節暫停宇內自應同化日斗南今復見文星
羊城桑梓還增價天使稱觴上鯉庭

送范靜之秋官便道展墓

天王封冊重宗盟選使西曹得老成范氏子孫看百祿
漢家恩禮厚東平方持玉節浮槎去却與青春作伴行
見說焚黃更乘便九原松柏被光榮

送魏德卿

故人久坐青油幕京國重逢喜盡情長劍暫從天外倚
短檠還入夜深明兒童漸長鄉音改俸祿雖貧宦況清
關外更聞賓上畧龍堆青海避先聲

次韻徐原忠

蓬門未款鶴先知已有園深出應遲松逕露晞行藥後
藕汀風動納涼時夜仍秉燭翻疑夢春許看花更作期
休倚清時催病客新文容有北山移

中秋待月飲城上次韋巷韻

高城隱隱月朧朧此夕秋光正及中雙寺曉鐘還入市
三湖新漲欲連空歌傳內侍憐蘓老興發南樓憶庾公
愁病強挑壺矢戰敢將全勝論成功

九日用舊韻

九日園亭獨舉杯夕陽餘興復登臺清池白鳥聯翩下
曲逕黃花爛熳開儒術無功慚潦倒帝鄉多病喜歸來
澆畦弄釣堪消日不道無情歲月催

暮春即事

書籤藥裹近藜牀
睡起虛齋日正長
科斗池塘古文字
倉庚庭院沸笙簧
林陰坐久衣裾潤
花徑行多屐齒香
病得賜骸耽勝事
擬將芹曝報吾皇

留別喬白岩王陽明次白樓韻

十年聚少別常多
綠鬢重看總向皤
勝地有招還遠赴
高軒無事亦頻過
離觴又對鍾山月
驛棹遙生漢水波
詩社儘收佳句在
相思隨處一長歌

次韻虞司訓新秋夜坐

時序新權又蓐收煩歎初散夜光浮夢驚寥廓一聲笛
興在武昌千尺樓南樹枝閒栖鵲定內家屏冷早螢流
朝來喜得虞卿訊新著書成病亦瘳

次韻童編修士疇

涼颼入夜奪南薰林壑朝來半白雲太華玉蓮思摘實
小山藂桂欲流芬齊紈楚簟行辭御雲鴈風蟬不斷聞
秋興總教詩思劇賞音今日賴逢君

九日園亭用杜牧之韻

揮翰題糕手欲飛菊邊香霧正霏微誰從今日仍辭醉
不道常年苦憶歸短屐未妨逢細雨殘尊還可待斜暉
官貧猶勝陶彭澤剛得東籬有白衣

九日東莊用前韻

丹楓零落白雲飛別墅風長酒力微坐待池菱炊飯出
行逢野菊戴花歸沙鷗貪看臨秋水林鵲從教亂夕暉
朝市久違疎散性欲從漁父問荷衣

中秋風雨有懷

節序無情鬢有霜
中秋風雨向昏黃
尊前舊社人千里
雲外新聲雁一行
病起未能攜楚壑
興闌何處據胡床
諸孫僅慰而翁意
燈火西窗夜正涼

壽顧處士次陳子雨學士韻

靜觀今古似圍棋
袖手誰論下着遲
翠籠早收雲裏藥
素盤時薦谷中芝
飛花學舞隨瓊管
急雨催詩漲墨池
玉樹階庭知幾許
漆園長映大椿枝

得告後用范以載侍御盧溝僻間韻

病思無端鬢有華
乞身剛喜得還家
緣深雲夢澤中水
心醉武陵溪上霞
諳道豈真須老驥
入林聊復羨歸鴉
東岡舊業堪衣食
種稻條桑更藝麻

邊汝嘉園亭雨後即事

山際殘雲放夕暉
竹亭移席柳風微
半開紅藥香初散
並坐黃鸝濕未飛
勝會祇慚詩力薄
芳時寧覺賞心違
主人為客添清味
旋剪階東韭葉肥

許州風節亭次韻劉東之御史美之正郎

煩囂何處可披襟
風節亭中散竹陰
地僻本無塵俗氣
夜涼先見歲寒心
風傳遠笛情何限
月轉長梢坐益深
安得題詩更明日
滿牆揮翰學來禽

喜晴再次前韻

夜分猶自蔗纖雨
忽聽朝來鼓角鳴
天末浮雲歸遠浦
海東華日上高城
街泥馱馱還驕氣
愁濕黃鸝作喜聲
揮策偶成如意舞
五雲深處是神京

哭周天兆

玉堂得告病初深，歸卧南池白壁沈。
梁月疑瞻千里面，江雲空寄百年心。
新阡起表人爭讀，舊館留詩客自吟。
我按越聲歌楚些，海天愁絕晝陰陰。

野望

東風吹雨宿塵輕，
膾膾村原正曉晴。
遠樹有花皆辨色，
好峰無數不知名。
雲開鴈鶩橫長塞，
草綠牛羊上廢城。
欲向燕山還極目，
夕陽時候更分明。

陵祀次溫民懷見贈韻

寢殿春開祀禮成
青林列炬散公卿
啼猿不盡垂胡恨
班馬惟聞隔澗聲
陶器應當流水設
野田還想歷山耕
泰陵又長新松柏
灑淚蒼崖夕照明

次韻何湖東見寄

三冬文史粗酌意
千里音書慰所知
秋水夢陪菰米飯
春園慚負杏花枝
平生溫飽元非志
前輩經綸自有基
心許扁舟同晚節
藕花風北水東涯

憶爾錫西莊舊游

下馬山堂犬亦迎，來遊年例近清明。
杏花深處聞幽鳥，溪水東頭上古城。
點筆欲題青竹徧，流觴時覺玉壺輕。
不應全廢今年約，芍藥開時尚一行。

田舍

山人田舍水東涯，草野盤飧頗自頤。
醅熟新鰕方製米，麥秋鮮鱸亦成絲。
香攢翠角菱收日，光爛銀船藕上時。
供奉曾叨大官饌，衰遲剛與此相宜。

暮春城西卽事用少陵韻

春去春來失送迎
送春今歲到春明
絮辭官柳欲迷路
花戀御溝還出城
攜榼未論燕釀薄
試衣渾愛越羅輕
蠶眠麥秀西原暮
記得農桑為此行

次惟明韻

與君合志復同年
爾汝忘從摠卅前
北郭林丘頻往返
東岡泉石更延緣
行藏意氣寧相遠
老大頭顱忽自憐
早晚投簪還舊隱
葛中藜杖共悠然

東莊

窗外羣峰遠更佳吾廬自可號山家
飛來好鳥尋常語移種新蓂次第花
木客每因求石蜜販夫頻到送溪茶
不妨兼有漁翁樂秋水東湖一釣槎

次九叔松石翁所遺韻

宦海清聲不愧天中年歸袖已飄然
秋花盈把陶翁逕春水平湖賀監船
教子頻宮期遠大作賓鄉燕禮周旋
葛中藜杖從容地共指人間自有仙

次韻李巨川遊東禪

舊遊煙景到仍迷歲月重驚幾攝提同濟叨隨元禮棹
幽尋疑入武陵溪華軒古塔從登眺好鳥穠花費品題
隱隱湖心來往路路人堪號使君隄

何湖東先生約社有作次韻

長安多病憶松筠詔許還家感聖神草閣枕書常謝客
花谿行樂或逢人吟當未穩仍侵夜飲但微醺不負春
慚愧耆英招入社重裁野服芟荷新

大椿洞

當岩開洞據空明幽事關心病亦輕
樹杪煙輕茶欲沸石傍苔破笋初生
山童池汲時無釣林鳥簷栖夜不驚
忽訝笙簧自何許荆扉西畔起松聲

次韻秦鳳山中丞留題

前駟駐馬問林塘遙望褰帷見繡裳
松逕畫輪重有轍草亭詩刻舊凝香
官階祗任歸青簡民隱還應入皂囊
慚愧山人疎懶慣旋求巾舄為君忙

送韋蒼歸番禺

楚遊千里計江程天屬相違此合并漢室郎占天上宿
荀家孫是膝前星試周喜看先持印問政何殊舊過庭
歸共親知談樂事玉缸須待倒南溟

九日值連雨用古韻

佳辰准擬酒腸寬連雨翻教減笑歡桂玉屢遲中婦饋
莓苔欲上野人冠場無露積妨秋穫篋未成衣犯曉寒
稍喜黃花解人意含章有意候晴看

東莊漫述

秋交伏窮殊未涼避暑却過湖東莊
梧桐下影忽復薄
絡緯作聲何太長
身本無能合教懶
鬢不為愁還自蒼
未怕鄰翁約做社
香秔紫秫皆登塲

東溪小景

閒遡東風去溪頭千樹花停舟偶然坐日暮未還家

梅莊

主人方濯纓寒花照芳芷未惜春樹殘上有青青子

姪壻胡瑞棹汀索詠

幽人居棹汀汀戶相還往醉後棹歌回月照青蘋上

鳬洲即事

見說瓜堪摘閒過洲上來小船風打去半日未能回

散步

細草緣蹊軟晴朝步屨遲往來深樹裏嘯鳥不曾知

陵祀次景伯時編修韻

滿路東風桃李花春光渾在野人家湘江游子緣渠惱

憶得林間與水涯

山水小景為孫太常題

猶記當年過郢中
清溪周折碧山重
聞歌白雪陽春曲
深樹層軒隔九峰

桃溪

世路悠悠已倦遊
桃溪深處草堂幽
東風自解幽人意
不遣飛花逐水流

宿彭澤

柳岸蘆汀秋水生
官舟才泊暮鐘鳴
無人為問陶彭澤
萬里長江天際橫

登臺

穿松入竹逕迂迴
潛繞坡陀却上臺
茶熟山童無覓處
東園花裏去還來

種芙蓉

東園花放白交紅
終日哦詩錦繡中
却恐高秋向寥落
繞池千本種芙蓉

許秉之移居月光臺

臺上草堂臺下田臨湖引水自豐年尋常坐倦拋書去
萬頃滄波一釣船

春日書院

門巷青苔隔路蹊小桃開滿磬池西枕書眠着無人喚
花裏東風百舌啼

剪春羅花開

花神巧事不勝多又逐天孫弄玉梭野服自來便卉葛

曉窗休更剪春羅

月夜園池泛舟

戴月乘風弄小航
橋南新水沒荻蔕
將迴撓更度荷花渚
涼露滿身襟袖香

九月三日芙蓉與菊同開

黃花開不待重陽
亦有芙蓉不待霜
為憶宣和新譜裡
已將金鈿對紅粧

領孫

綠池繞逕恣閒行已有園中正晚晴學語小孫多事甚
牽衣隨處問花名

東湖書院

山圍書院好峰多行處新詩日幾何中有幽棲人不到
綠蘿深洞白雲窩

寶珠山茶戲作

季倫當日闕豪華戚里珊瑚信手撾誰道漢濱窮措大
寶珠無數不曾誇

張處士輓詩

古姆山頭歌大招閭風何處獨逍遙
愁雲晝合江天暗
摸索風前酹酒瓢

剪金花

即王不留行

剪金元是俗相稱
病客相逢莫諱名
天上乞歸曾累疏
君王非是不留行

杭雙溪憲長寄示江行詩次韻

新秋江月送官舟
綵鷁青簾擁皂樓
夜半棹歌誰省記

有人閒卧白蘋洲

初夏即事

木天清絕稱劬書何處齋軒更此如乳燕夢閒人莫到
綠槐風細碧窗虛

夢梅花

故園梅樹開花未頗怪南枝入夢勤此夢定知何處應
畫中逢見笛中聞

采石

謫仙佯醉上天時采石江頭捉月騎
千古何從見顏色
夜深江月正堪疑

外舅挽章

一官遙郡乞身回舊業南湖只釣臺
今日湖濱黯風雪
豈堪還見白鷗來

又次鍾歸州新春見懷韻

幾時不得巴東信江郡紅梅已復新
走傍長亭求驛使
為傳臨水一枝春

護樹

緣村乞樹繞園栽紅白花教取次開培築未周風雪到
擁簑編箔夜深回

橫州

來迎官吏說橫州遙立蒼厓石上頭也欲乘高閒縱目
黃昏風雨暗江樓

石倉歷代詩選卷四百六十

欽定四庫全書

集部

石倉歷代詩選卷四百六十一

詳校官右中允臣薩敏

侍讀臣孫球覆勘

總校官進士臣朱

鈐

校對官編修臣盧

燾

謄錄監生臣唐

澐

欽定四庫全書

石倉歷代詩選卷四百六十一

明 曹學佺 編

明詩次集九十五

何瑄

入院言志

幽邃隔塵境崢嶸鄰帝居
庭槐鬱青翠窗竹蔭扶疎
剪
緋花傍檻漱玉泉遶除
睠惟翰苑清奚翅夏屋渠
簡拔

幸見收進脩敢云徐趨隅咨問頻對床切磋胥蒐玄緒
六經考古研羣書綺麗戒浮薄淳樸返古初聖賢果何
人日月柰居諸邈矣吾道大滄海連歸墟仰瞻際乾蓋
俯視蟠坤輿一得遽自滿奚異井底魚風高鶴夢驚天
空鵬翮舒行藏有矩範祿位慚素虛去去王屋山翹首
承明廬

得友人書

晝寢驚叩門滿耳聲剝啄開門見鄉人新來自河洛袖

中出短書云是故人作開緘見故人反使心腸惡栗夫
家屢空致中體如削元善雖無恙乳乳形影各離索感
此時同遊念前約沈吟久無言矯首望天末

送方士

先生覃懷來復向覃懷去悵望難久留離魂裊煙樹憶
昔讀書舍寄在蓬萊宮長松掛海月短章留春風同窗
四五人肝膽如一身雖存經濟志亦與雲蘿親先生時
來過談笑共抵掌赤水涉波瀾玄珠譏象罔別來三年

餘相思空寄書死者不可見生者猶離居歸時見故人
為問平安否紫氣映冥鴻夜夜頻回首

鶴舟

君家有鶴舟泛泛江中流停橈丹鳳山鼓柁紫麟洲欲
濟沈溺人撐到鳳池頭世事不可意歸棹難久留我家
有虛舟飄飄河內浮東風亦漂蕩邂逅暫夷游常恐波
浪生命與蛟龍謀子去我所羨我留君不憂解纜未忍
別題詩記綢繆再會未可必相憶商聲謳

楚昭王圖

闔閭戈甲中宵起雷鼓喧轟震千里桔槔火照楚王宮
倉皇逃避浮江水中流風起生白波龜鼉出沒蛟龍多
小船重載懼沉溺君王淚下雙滂沱王弟王妃並王子
䟽者下船誰可使君王手扯介弟衣儲宮相逐慈闈死
嗟嗟薄俗不堪陳兄弟何如妻子親忽見畫圖驚往事
新詩吟罷倍傷神

琴溪宅分韻

國子先生前太史大暑開筵梵宮裏南風生涼差可喜
況有冰漿浸寒李飲酣執盞逡巡起一語相期誓終始
諸公盡是天下士四美二難烏足擬

送楊太常歸省

卿寺遷喬久家山入夢頻暫辭黃閣老還慰白頭親道
路無多慮將迎有故人聖朝須佐理莫戀錦江春

歸雁次孟望之韻

何處堪惆悵歸鴻嘹唳音關山千里路光景四時心影

入春風靜聲傳盡閣深冥冥霄漢上羅網莫相尋

酬孟望之

憶昔梁園會憐君意氣投雲霄方並轡風浪復同舟黃
屋空回首清樽且解憂賈生如曉事應不弔湘流

和郭杏東除夜

除夜圍兒女高堂隔老親本無經世策空作去鄉人勲
業看吾友蹉跎嘆此身家山并仕路來往自嫌頻

元旦次蒲汀韻

身事憐衰白羈栖感歲年雲光占曉日花蕊媚晴川
家遠書難得鴻歸信欲傳高臺頻極目風景故依然

挽西郊宋處士

詩酒陶元亮蕭條住遠垌傷哉新塚白愁對舊山青
同穴憐雙壁傳家在一經笑談春滿座猶可想儀刑

次杏東元宵韻

帝城元夕盛燈火畫堂深節序同南北人情異古今
星河憐晚霽花柳怯春陰笑語喧兒女翻傷老苦心

次對雪韻

感時驚雨雪撫已惜精神
鏡裏容非舊天涯歲又新
愁來便枕簟客至強冠巾
聚散思今昔相看意更親

送李守正歸棠邑省親

宦途邂逅與君同又見歸旌逐斷鴻
東觀月明清夢遠北堂春好壽顏紅
滄溟汗漫魚龍水平野蕭條草木風
忠孝此行真兩盡天涯極目思無窮

癸亥雜詩

出谷鶯啼楊柳綠客邊風景似年時
西山凍釋抽新草
上苑春歸入故枝
心念舊遊頻眺望
夢回殘月倍相思
催朝無柰鷄鳴早
又逐羣英過鳳池

其二

故園門巷枕黃河
散亂牛羊草滿坡
兩岸夕陽行客棹
一犁春雨老農簑
撥醅酒熟尊顏醉
擊缶聲喧稚子歌
惜別天涯幾芳草
夢回茅屋月明多

其三

黃金臺畔太行隈千里風光一日回
白馬渡迷芳草合紫金壇迥曙煙開
笙歌到處留人醉車馬誰家上塚來
坐想舊遊真似夢野花黃蝶徧蒿萊

其四

盤谷燕川二月寒馬頭溪水隔天壇
黃茅路遍幽人徑白石燒成道士丹
風煖野禽朝對語月明松鶴夜交懽
採真擬結峰頭屋引領西南盡日看

其五

十里雲霞鎖洞天靈踪千古尚依然老君池水深春雨
黃帝松陰暗曉煙盤谷斷碑芳草外玉川茅屋野花前
別來勝景應如昨歸去繁霜懼滿顛

其六

目窮郊野遍芳菲清曉登樓轉夕暉風撼上階花影亂
雨滋穿土草芽肥採芝商嶺人何處種菊潯陽事已非
同學故人偏自得海鷗沙際共忘機

其七

青春回首思悠悠
王屋山高沁水流
觀國念存空倚劍
思鄉魂斷獨登樓
悲鳴夜月籠中鶴
泛濫春波海上鷗
寂寂桑榆歛殘照
麗譙吹角使人愁

其八

聞道商山老紫芝
百年短景不勝悲
紅塵滿眼空憐我
青史流芳竟屬誰
杖化葛陂龍去遠
笙聞緱嶺鶴來遲
王孫草綠煙汀晚
獨倚危欄自詠詩

追挽復齋王憲副

清新曾讀復齋詩
看宇居然見紫芝
翰苑烏臺憐往事
青蠅白壁恨當時
平原草滿鴛飛急
孤塚苔荒鶴弔遲
我欲招魂歌楚些
乾坤浩渺不勝悲

望泰陵

玄扃一自掩重關
惆悵龍髯不再攀
絳節定應歸帝所
翠華無復到塵寰
亂峰殘照玄猿哭
衰草寒煙石獸閒
載筆小臣凝望久
玉樓瑤殿倚空山

送潘仲魯使安南

風塵時節送君行
萍水分攜百感生
六館交遊曾刮目
十年離合最關情
山川渺渺蠻中路
霧雨昏昏海上城
玉冊已頒王事畢
便催車馬轉歸旌

酬李序庵次韻

鞍馬紅塵日送迎
累驚時節變陰晴
白衣蒼狗有何意
流水高山無限情
把酒舊曾臨鄭圃
題詩誰復共韓檠
故人若問年來事
華髮新從鏡裏生

贈侯汝立次韻

黃堂伴食歲棲遲彤管題詩淚欲垂疎懶自宜陪鹿豕
奔騰誰復逐龍螭茅齋夜月談玄榻野店春風賣酒旗
便好掛冠從此去帝鄉回首路逶迤

同館會都下者十有三人以塵世難逢開口笑
菊花須插滿頭歸分韻花字同賦歸字

朋簪重盍慰睽違仕路年來覺漸非紫極關心明主在
青雲回首故人稀半生歲月閒中過十畝園林夢裡歸
古昔英豪俱泯沒不須相向欲沾衣

贈方時舉少參次韻

道學千年說二程涪州歸詔促裝行也知西監非崇秩
自是清朝忌盛名天姥山高冬月小浙江潮上曉雲晴
歸途紀興詩囊滿風便何妨數寄聲

次周半塘遊天台韻

隨州詩句敵長城況復登臨逸興生瀑布泉流山自好
柏臺公暇趣偏清洞閒雲鎖人來少橋險風高鳥度輕
笑我塵凡少仙骨肩輿空望晚峰行

送潘氏叔姪還湖廣

西風吹雨正重陽
征馬蕭蕭客袂涼
棊萼情知離別苦
竹林歸念道途長
南溟水闊搏鵬翼
北極天高斷鴈行
遙想紀行詩滿卷
莫將幽意弔沉湘

送鄧二府致政歸膠州

夢覺黃梁萬事空
倚欄翹首羨冥鴻
懶從赤紱稱循吏
擬向滄浪狎釣翁
孤鶴伴吟臨夜月
蹇驢馱醉入春風
東西路阻音書少
林下知誰笑語同

題淮浦卷

長淮之水東南流，美人家在淮上頭。
滄波碧石有深趣，朝史暮經無外求。
東風側耳聽黃鳥，夜月捲簾招白鷗。
畫圖一見擬相訪，何處元龍千尺樓。

齋居

齋館寒燈獨不眠，譙樓更鼓晚風傳。
夢歸戲彩花當戶，睡起推窗月在天。
驚鵲南飛翔夜樹，征鴻北去沒春煙。
詩成欲寄同心友，恐惹閒愁到客邊。

其二

瑞藹祥光滿戶庭
高瞻黼座儼威靈
讚傳行禮千官肅
工奏登歌衆樂停
對越聖容深穆穆
降臨神馭遠冥冥
江湖翹首層霄上
愁絕孤臣兩鬢星

秦淮一覽閣

畫閣臨流想像題
倚欄翹首覺天低
落花無數侵簾入
好鳥多情傍戶啼
近水迢迢經雨綠
遙山隱隱拂雲齊
從來吏隱難兼得
城市還驚似澗溪

贈貳尹李大人致政西歸

數載哦松興有餘一朝解組意何如
摩空倦鳥投深樹過雨閒雲歛太虛
酒熟邀朋談往事心閒教子讀遺書
林泉自有無窮樂肯為浮名嘆索居

東津招飲贈詩酬此謝愛

鳥啼花發報新年對酒論詩興藹然
甲第韓歐元共榜風流李郭更同船
此時酒盞寧辭醉他日詩筒莫厭傳
離合此生知未免笑談回首社壇邊

送唐府丞送母還鄉

牙樯錦纜奉慈顏兩岸人誇舞袖斑
京兆平刑聞一笑帝城迎養記三山
長江渺渺征帆急落日停停去鳥閒
畿甸焦枯望霖雨石榴花發候君還

清風亭賞牡丹次華泉韻

上苑芳菲第一叢何年移入禮臺中
堪嗟富貴非前日誰信清高有舊風
夜月皎如銀燭照曉煙輕似碧紗籠
不須對此頻惆悵萬品榮枯屬化工

次華泉賞牡丹韻

寶欄春曉爛生光照眼花開正艷陽唐世御袍還愛赭
漢宮粉額盡塗黃更憐上苑風前色兼有東籬月下香
老厭妖嬈愛清雅幾回徐步過前塘

次仰止送周貞菴韻

四月南風錦纜斜送行冠蓋集江涯漫嗟于役還高詠
共說詩壇讓大家檣櫓影搖波底月旌旗光映岸傍花
樓船到處鯨鯢避博望虛傳海上槎

送張申臺巡撫遼東

帝城東北是遼陽旌旆悠悠去路長
千里山川歸節制萬年襟帶識封疆
使星照處田禾熟甘雨零時草樹芳
見說賢閭秀無比政閒應上最高岡

和郭杏東九日韻

吟苦偏愁白髮催故人何事擲詩來
籬邊黃菊花相對客裏清樽酒自開
南國此時聊遯跡北扉當道正需才
嗟予潦倒無他望獨立西風想釣臺

其二

重陽細讀黃花句，懷抱因君一暫開。
杜甫當年悲作客，陶潛今日醉銜盃。
殊方久廢登高興，青眼誰憐濟世才。
北望親闈腸欲斷，塞鴻頻到少書來。

病歸留別諸友次浚川韻

幾年塵土污華簪，歸想南莊樹影深。
廊廟山林元異趣，野雲沙鳥是知心。
不嫌鄰叟挨肩坐，却恐明公枉駕尋。
沈水煙消荻簾捲，綠槐高處一蟬吟。

次鳳凰臺韻

春來閒上鳳臺遊
極目長江天際流
紫氣蔥蔥籠殿闕
蒼煙漠漠上林丘
功名誰畫麒麟閣
詞藻空傳鸚鵡洲
且對青山傾綠醕
莫教明月笑人愁

送陳侍郎奏績京師

少宰朝天及早春
羣公相餞集江津
九霄宮殿皇都遠
千里鶯花驛路新
鳩鵲樓頭傳刻漏
鳳凰池上聽絲綸
袖中應有山公啓
見說君王訪舊人

送樾岡

青春旌旆照長途相餞中丞赴上都聖主臨朝求治理
遠人傾耳聽嘉謨兩淮煙水連南北三晉雲山似畫圖
見說經過豺虎避至今歌頌滿樵蘇

同年殷僉憲遷居五松月有贈因和

華居新買傍城陰流水橋南帶茂林車馬稀疎緣地僻
煙花撩亂覺春深醉扶竹杖看魚躍困倚藤床聽鳥吟
最愛三山當戶牖晚峰相對翠千尋

贈通渭王夢祥

三十年前舊弟兄一樽相對眼偏明
雲山此去依春隴車馬何時復帝京
世易蹉跎男子志老難離別故人情
關中知己如相問報道新來欲避名

雜畫

稚子江邊攜水去野人雲外採樵歸
閒亭晝永紅塵淨坐看幽禽自在飛

其二

洞簫吟徹大江風回首曹劉事業空赤壁仙翁竟何處
青山依舊舊月明中

其三

兩地相思見面難
輶將微物寄平安
親朋問我年來事
閒看漁翁把釣竿

懷陸子淵

共誰虛室細談玄
東望江雲意渺然
憶昔少年今老矣
不堪吟對菊花天

趙子昂鰕圖

曾聞魚藻頌皇都見說杭城殿閣蕪却想王孫揮筆處
也應回首念西湖

梅雪卷

梅花開放雪花飛矮屋斜穿一徑微松頂忽聞玄鶴唳
主人扶杖夜深歸

石倉歷代詩選卷四百六十一